


漢
上
易
傳

周易下經豐傳第六

翰林學士朝奉大夫知制誥兼侍讀兼直學士書長林縣開國男食邑五百戶



離下震上

豐亨王假之勿憂宜日中彖曰豐大也明以

動故豐王假之尚大也勿憂宜日中宜照天下也日中則昃月盈則食天地盈虛與時消息而況於人乎況於鬼神乎

豐泰九二之四也乾變離明坤易震動明以動則亨亨則大豐大也故曰豐亨彖曰豐大也明以動故豐此合兩體言致豐之道也假至也乾在上之象王者明以動其道亨乃能至於豐大九二上行至四王假

之也王假之者尚大也四海之廣萬物之衆无一物不得其所无一夫不獲自盡非小道之所能至故曰王假之尚大也此以九四言乎豐之才也二四失位爲憂離下有伏坎爲加憂離見坎伏勿憂也然明以動勿憂其至於大也進而至於五則得位矣故曰勿憂此以九二之四言乎豐之才也離日震動日當五爲中日動於下升于東方明動不已九四進五何憂乎不至于中而无所不照哉日之大明萬物咸覩宜照天下也乾爲天五離應二照天下也太玄曰日正于天何爲也曰君子乘位爲車爲馬車軫馬駟可以

周天下故利其爲主也宜日中則正于天利其爲主
之謂也故曰勿憂宜日中宜照天下也此以九二進
而至五言乎豐之才也五復降四坎離象變離成兌
日在酉日中則昃也坎成兌巽兌爲日月闕於巽辛
月盈則食也四乾陽長於震二坤陰生於離陽長盈
也息也陰生則盈者虛消者息矣有天地然後有人
有鬼神鬼神往來於天地之間者也豐大之時所宜
憂者不在乎未中而常在乎日之旣中也何則日中
俄且昃矣月盈俄且食矣盈者必虛息者必消天地
之所不能違者時也而況天地之間聚而爲人散而

爲鬼神乎明動不已未有能保其大者也保此道者其唯中乎故曰日中則昃月盈則食天地盈虛與時消息而況於人乎況於鬼神乎此復以坎離升降明豐之戒也在卦氣爲六月故太玄準之以大廓

象曰雷電皆至豐君子以折獄致刑

雷電皆至萬物豐大之時豐則生訟故君子法其威明並用以治刑獄電明照也所以折獄雷威怒也所以致刑折獄者以正折其不正初二三正也而二有伏坎爲獄不明則枉者不伸致刑者刑其不正而已四五不正也允爲刑殺不威則小人不懼噬嗑其明

在上君子在上之事也故爲明罰飭法豐用明在下
君子在下之事也故爲折獄致刑

初九遇其配主雖旬无咎往有尚象曰雖旬无咎過旬
災也

泰九二之四成豐故九四爲豐之主配者陰陽相匹
孟氏鄭氏本作妃嘉耦曰妃妃媿也亦匹配之意初
九九四陽也六五陰也初與四不應六五亦无應四
雖不應初可因四爲主而配五陰陽相配故九四爲
配主遇者不期而會四不應初而初九主之不期於
會而會故曰遇其配主旬均也初九九四均也然明

動相資致豐之道非明則動无所之非動則明无所
用是以均而无咎无咎者初九以正相資也初九遇
四往而相易以致用則初得尚于五而豐之道上行
矣尚亦配也與尚于中行之尚同故曰往有尚也夫
初九遇九四所以得尚于五者以正相資而成豐譬
之共難則仇怨協力勢使之然若妄動不正過四而
有其位明動不相爲用過旬也過旬則失其配主往
而无所尚與坎險相會災至矣豐道之所以災也故
曰過旬災也初動有小過象故曰過旬謂之均者六
甲周行乘八節其數四百八十而成鈞鈞勻也初九

離納巳九四震納庚自己至庚九十日十日周而復
始故訓勻

六二豐其蔀日中見斗往得疑疾有孚發若吉象曰有
孚發若信以發志也

震巽爲草二在草中有周匝掩蔽之意故曰蔀陸震
曰歷法凡十九年閏分盡爲一章四章九七十六年
爲一部五蔀周六甲凡三百八十年而曆象小成豐
蔀之名蓋寓此意離目爲見豐爲日中五爻伏艮艮
離爲天文賁之象也震少陽其策七震爲動有星在
上動於中而其數七斗之象也二有至明中正之才

以豐時遇闇弱不正之君猶當晝而夜至於見斗其
昏甚矣坤爲冥晦闇之象五旣不能下賢二自往見
反得疑疾自往者亦取疑之道巽爲不果六五陰失
位疾也然二五相應之地有孚之理二積中正不已
盡其誠信以感發其志則五動而應之乃古易傳曰
苟誠意能動雖昏蒙可開也雖柔弱可輔也雖不正
可正也古之人事庸君常主而克行其道者已之誠
上達而君見信之篤耳

九三豐其沛日中見沫折其右肱无咎象曰豐其沛不
可大事也折其右肱終不可用也

沛古本作旆正弼以爲幡幔震爲玄黃允金斷之旆也幡幔圍蔽於內故豐其旆沫斗後小星微昧之光子夏傳及字林作昧三之上成良良離爲天文星在斗之後隨斗而動者昧也三明極而剛正處豐之昧上六闇極矣猶日中當明而反見斗後之星其闇尤甚巽爲事陽爲大伏坎爲可豐尚大也豐其旆往見則不明故退而守正以不可大事故也兌爲右伏艮爲肱兌折之折右肱也上六闇極不可用之以有爲從之必懼其咎故自折其右肱示終不可用則无咎九四豐其蔀日中見斗遯其夷主吉象曰豐其蔀位不

當也日中見斗幽不明也遇其夷主吉行也

四動成坎離光明也不動成震巽震巽為草掩蔽周
匝部也四在部中處不當位自蔽其光明故曰豐其
部兌有伏艮四應離初艮離為天文震動也其策七
有星動於上而其數七之象離目為見四處不常位
又不能變若動而交初則幽者明矣坎為隱伏故也
以此處豐猶日中之時而反見斗處幽暗而已不明
故曰幽不明也九四不正其不明自取之異於二三
矣夷主者謂初也九四與初九均為陽而上下不敵
四忘其勢下夷於初四者初之所主也故曰夷主初

正正則吉初九助四而上行以資其明吉行也易傳
曰居大臣之位得在下之賢同德相輔其助豈小也
哉

六五來章有慶譽吉象曰六五之吉有慶也

六五屈體來下於四與之共天位九四之明上行之
五相錯成離坤離為文章者文之成也九四上行則
初應四二應五三應上六爻並用成豐大之慶五屈
已下賢四志行乎上人自譽之兌為口譽之者也五
得正吉也

上六豐其屋蔀其家闕其戶闐其無人三歲不覲凶象

曰豐其屋天際翔也闕其戶闐其无人自藏也

自二至上體大壯棟宇之象上六動陰變陽爲大豐其屋言自處高大也二爲家震巽爲草豐盛周匝以掩蔽之節其家言所居不明也自處高大所居不明以高亢自絕於人如飛鳥務上翔於天際豈復能降哉上動成離離爲飛鳥乾爲天在外卦之際天際也豐之時九四忘其敵已下資初九三與上六正應也其能忘乎故三自下往庶幾發其昏暗知處豐之道九三離目爲見往闕之坤戶闐而不應闐寂乎其无人聲太玄所謂外大抗中无人也三於是退而自藏

於坎中乾為歲三百四歷三爻三歲不覲也豐其屋
蔀其家自絕於人也三歲不覲人絕之也上六動不
正凶也不直曰凶者有應焉猶巽乎下交也至于三
歲不覲人亦厭之而凶至矣闕小見也覲私見也自
上六言之謂之窺陰為小也自九三之上言之謂之
覲私見也私不正也

三三

艮下
離上

旅小亨旅貞吉彖曰旅小亨柔得中乎外而

順乎剛止而麗乎明是以小亨旅貞吉也旅之時義大
矣哉

旅否之變也剛當居上柔當居下六居五失其所居

而在外旅也然六居五柔得中矣得中則其柔不過
得為旅之中道易傳曰中非一揆旅有旅之中也柔
得中則能順乎上下之剛不為剛所揜而小者亨順
乎剛而柔失中旅道窮矣坤順也君子入國問禁與
之日從新國之法順乎剛也故曰柔得中而順乎剛
此以六五言旅小亨也九居三未為失其所居也然
剛自五而反居於下猶為旅也居三成艮屈其剛而
止於下自謙屈之道也雖止乎下矣然九三正止而
不失其正上麗乎離之明君子之居是邦也事其大
夫之賢者友其士之仁者麗乎明也正然後能麗乎

明不正人將拒我矣正則吉故曰止而麗乎明此以
九三言旅貞吉也旅難處也旅如六五柔得中乎外
而順乎剛在我者不失已矣乃可以小亨旅如九三
止而麗乎明在彼者亦不失人矣乃可以貞吉是以
旅一也而再言之易傳曰旅困之時非陽剛中正有
助於下則不能致大亨如卦之才則可以小亨得旅
貞而吉也四方固男子之事居者必有旅也顧處之
如何耳夫子歷國應聘嘗去父母之邦矣去他國矣
欲浮于海居九夷矣蓋得旅之時義也旅之時不一
而義者時措之宜知其時而不知其宜不可也非大

人孰能盡之故曰旅之時義大矣哉在卦氣為四月
故太玄準之以裝

象曰山上有火旅君子以明慎用刑而不留獄

山上有火明而止止而不處旅也君子之用刑也雖
明而止故明而慎於用刑雖止而不處故亦不留獄
明者或不慎慎者或留獄失旅之象也離有伏坎為
獄兌為刑殺艮止慎也

初六旅瑣瑣斯其所取災象曰旅瑣瑣志窮災也

鄭曰瑣瑣小也艮為小動而之四復成艮小之又小
瑣瑣也初六小人之旅卑柔而不中正恃應而求於

四者襲其細已甚故曰旅瑣瑣四巽極而燥火性炎
上不能容初艮止也厭止妄動往而復止人亦厭之
志窮也坎險災也志窮遇險斯其所取災也艮爲手
有求取之象楚申侯是已曰斯曰其者初四上下皆
艮手取災之象故指兩爻言之

六二旅即次懷其資得童僕貞象曰得童僕貞終无尤
也

艮止也二得位止而得位即次舍也離兌爲羸貨負
資財之象二巽爲入懷其資也童僕一本作僮僕艮
爲少男初卑陰賤二在上畜之童僕也初於二得童

僕貞也童僕貞則二親信之而不疑旅在下柔而中正即次所遇而安也懷其資得三四五之助也又得童僕貞貞而下承之旅如是多助矣故動而之外終无尤之之者五兌爲口尤之者也初六不正而曰貞者貞於二也貞於主人二巽東南主人位也歸妹九二利幽人之貞貞於五也童僕貞然後次舍可止資貨可有夫子曰審其所以從之之謂貞也

九三旅焚其次喪其童僕貞厲象曰旅焚其次亦以傷矣矣以旅與下其義喪也

艮止也五得位止而得位次舍也巽木離火焚其次

也九三在旅而過剛四五之所不與則失其所止有
焚其次之象兌爲毀傷也旅失其所止亦可傷也初
艮爲童僕九三既失其所止以旅之故乃巽而與下
失尊卑之宜初三易位初失其正喪其童僕貞也所
以喪者爲旅之義剛柔皆失中旅如是寡助危矣六
居三不正危之道

九四旅于處得其資斧我心不快象曰旅于處未得位
也得其資斧心未快也

二三止而得位爲次舍四巽爲入而未得位行者處
而已入對出言之爲處九四非安處也故曰旅于處

離兌爲羸且資也離爲兵巽木貴之斧也得其資以爲利得其斧以爲斷上得乎五下得乎三之助矣九剛明之才而處四履謙能下善處乎旅故得上下之利有資貨焉有器用焉雖不若六二亦曰得其所矣然未得位也上不足以發五之志下不足以致九二之賢雖得資斧未免爲旅人故我心不快兌爲決中爲心四進而上道行于五而二應則快矣孟子曰父於齊非我志也

六五射雉一矢亡終以譽命象曰終以譽命上逮也

五在旅卦不取君象君不可旅也離爲雉雉文明之

物文明人文也聖人止亂而不以威武者也離為兵
伏坎為弓伏艮為手兵加之弓上矢也矢者射雉之
器五動弓矢發離坎毀而雉亡一矢亡之也一矢亡
雉者五得中道動而必中乎理之象然六五未當位
雖有文明之德未可以動上九屈體逮之則令譽昇
聞而爵命之矣兌口在下與之譽也巽為命上卦之
終由譽而後命之始也未當位終也譽命故曰終以
譽命五進上其在賓師之位乾西北賓之位也

上九鳥焚其巢旅人先笑後號咷喪牛于易凶象曰以
旅在上其義焚也喪牛于易終莫之聞也

上九離為飛鳥九動變六成震巽巽為木震為竹葦
鳥隱其中巢也上九極剛以高亢居上非旅人之宜
巽木離火鳥焚其巢失其所也離目動震有聲笑也
樂其未焚之前柔順謙下時也兌澤流於目巽號出
於口哀於既焚之後悔其先之時也上與三相應之
地上六變而正成坤坤為牛九三應而上升三二成
坎坎為耳上九高亢不變坤象隱喪牛也易輕易也
火性剽疾上九極剛輕易也故曰喪牛于易九喪柔
順三不往應坎耳伏矣輕易者自塞其耳而聰不明
也陸機羈旅處群士之上而不聞牽秀孟玖之毀其

以高亢輕易而致禍乎

三三

巽上巽下

巽小亨利有攸往利見大人彖曰重巽以申

命剛巽乎中正而志行柔皆順乎剛是以小亨利有攸往利見大人

柔在下而承二剛巽也巽為風風者天之號令命者

天之令也故巽為命內巽者命之始外巽者巽而達

乎外申前之命也重巽之象唯可施之於申命先儒

謂上下皆巽不違其令命乃行也若施之於佗則巽

已甚矣故曰重巽以申命此以兩體而言巽也巽自

遯來訟之變六三之四上下皆巽九二之剛巽乎中

也九五之剛巽乎中正也巽乎中正則其剛不過而
所施當乎人心是以志行乎上下故曰剛中正而志
行此以三四相易而言九二九五之巽也九二之剛
巽乎正則初六之柔順之九五之剛巽乎中正則六
四之柔順之上下之柔皆順乎剛則物无違者而也
二九五之志行故曰柔皆順乎剛此以初六六四言
大者巽則小者无不順也柔皆順乎剛雖无違者然
順乎中正乃善不然失所從矣六四離目爲見大人
者九五剛而巽乎中正者也剛巽乎中正而柔順之
則柔者亦得其正而小者亨矣豈非小者之利乎故

曰利見大人此以九五言巽之利也小者亨矣故六
四利有攸往利見大人而其道上行故曰是以小亨
利有攸往利見大人徐氏王昭素考王弼注有命乃
行也四字當在重巽以申命之下疑象或脫文理若
有之在卦氣爲七月故大玄準之以翁

象曰隨風巽君子以申命行事

巽爲風風巽而入者也前後相隨而至則歲事行矣
故巽又有事之象傳言八風之至各以四十五日而
成一歲是也君子申命謹謹者行事也行事莫如巽
巽則易入

初六進退斜武人之貞象曰進退志疑也利武人之貞
志治也

巽初行事之始也居卑體柔不能自立過於巽者也
退則不安進則无應又二剛據之莫知所從巽為不
果故曰進退志疑也六變九巽成乾應允乾為健允
為決疑志去矣健決者武人之貞天道尚右故允為
武人志疑者不先治其志也君子自治其動以正行
之以健決確乎不可移雖千萬人必往孰能奪其志
哉故曰利武人之貞志治也巽為工有治之意易傳
曰治謂脩立也

九二巽在牀下用史巫紛若吉无咎象曰紛若之吉得中也

巽初坤變乾也巽為木坤西南方乾為人設木於西南之輿而人即安焉者牀也巽股變艮股見手伏蒲伏于牀下之象九二不正卑巽如此宜有咎然九二剛中其動也正卑巽者非為利也將以誠意感動九五而已故用史巫紛若吉吉者正也九二之動上之五成震震為聲五之二成兌兌為言上九宗廟兌口出聲祝史道人之意以達于鬼神之象六降于二巫以鬼神之意告于人之象史巫皆尚口而巽故也四

巽離爲絲二五升降史巫紛若則卑巽之意達于上
下巽在牀下何咎之有此子游重服立諸臣之位以
感悟文子之道也二五中也九五未應則巽在牀下
用史巫紛若乃爲得中

九三頻巽吝象曰頻巽之吝志窮也

頻水厓與復九三頻復之頻同兌水澤三水澤之際
九三重剛不中在下體之上巽極而決躁不能巽者
也將遂其剛亢歟則上臨之以巽四以柔相親九二
之剛近而不相得將變而爲柔歟則安其所處憚於
改過有吝之意然志已窮不得已而巽猶人行至于

水之厓欲前得乎故曰頻巽之吝志窮也易傳曰雖欲不巽得乎哉

六四悔亡田獲三品象曰田獲三品有功也

四无應乘承皆剛宜有悔四本遯之六二自二之四一變訟二變巽二田也艮爲手柔道上行之四得位處二陽之際上巽於五下巽於三三爻皆正而相得故田獲三品古之田者上殺中殺下殺爲三品三品則徧及於上下允有刑殺之意而又伏艮爲黔喙之屬巽爲雞離爲雉爲三品以巽事上臨下上下與之巽而有功雖无應也乘承皆剛也其悔云矣故曰有

功也易傳曰天下之事苟善處則悔可以有功矣
九五貞吉悔亡无不利无初有終先庚三日後庚三日
吉象曰九五之吉位正中也

九五君位而正中巽為號令有申命之象故舉全卦
以盡一爻之義五无應宜有悔正故悔亡動則二應
之二五皆正故无不利初二不正始未善也五正善
而有終也无初故申命申命則有終初未善也故巽
以命之先庚三日變家人變益之時也下二爻震震
納庚離為日先於此庚之使善也後庚三日變噬嗑
變震之時也震納庚離為日後於此庚之慮其未及

善也先庚後庚主於中正也十日之次以戊己爲中過中則變故庚謂之更更而正中正則吉此九五之所以吉歟蠱卦六五柔故爲蠱巽九五剛乃有更變之善更天下之弊其唯剛中乎

上九巽在牀下喪其資斧貞凶象曰巽在牀下上窮也喪其資斧正乎凶也

上九以巽而居高位處之不當窮則變而反下三以重剛乘之巽股變良手有恐懼自失而蒲伏于牀下之象故曰巽在牀下離兌爲羸具爲資所以利也離爲兵巽爲木貫之爲斧所以斷也上窮反三離兌巽

毀故曰喪其資斧喪其所以利則莫或愛之喪其所
以斷則莫或畏之正乎凶矣上復位遇坎險正凶也
魯自襄公三家分其民其君四世從之至昭公失國
无所竄伏蓋處上極巽盡亡其資斧乃正凶也方自
失之初告之以凶詎肯信乎

二二三兌上兌下兌亨利貞彖曰兌說也剛中而柔外說以利
貞是以順乎天而應乎人說以先民民忘其勞說以犯
難民忘其死說之大民勸矣哉

兌以一陰居二陽之上陰說於陽而見乎外者也兌
巽之反初六之上六四之三柔說於外二五不失其

中以說行剛而剛柔皆亨故曰允亨彖曰允說也此合兩體卦變而言允也剛中則實柔外則接物以和說而正則和而不流卦九五剛中而正九二剛中而又戒之以利貞者二三四不正不正則陷於邪諂悔吝將至故說道利正非道求說不利也亦何由亨哉故曰剛中而柔外說以利貞此以兩體六爻言允也乾天也上五天位也坤順也初六之上而說順乎天也三四人位也六四九三相易而說應乎人也天人殊位順乎天者而在於應乎人而已天之說萬物陰陽相說降而爲澤說之非其時則亦不能說矣湯武

之征伐出其民於水火之中而民大說是所以順天也知人則知天知天則知說之道故曰順乎天而應乎人此以上六六三兩爻而言兌也坤爲衆民也坎爲勞兌決坎爲大川險難也坤爲死以內卦言兌先於坤說以先民也坤衆從之兌見坎伏民忘其勞也以外卦言之巽股而涉大川之險坤化爲兌民忘其死也夫就佚辭勞好生惡死民之常情用之以說乃忘四體之勤決一旦之命而不顧非說之以道能如是乎古之人有行之者周公之東征是也故曰說以先民民忘其勞說以犯難民忘其死民和則氣和氣

和則天地之和應說之大天地不能違而況於民乎
故曰民勸矣哉此再合兩體無伏爻而言兌也在卦
氣爲秋分故太玄準之以沈

象曰麗澤兌君子以朋友講習

麗連比也澤水所鍾兩澤相麗重說也說之大者也
天下之可說而无數者无若朋友講習之爲大也易
傳曰兩澤相麗玄有滋益朋友講習玄相益也兌與
兌同類爲朋初上五始終以正相助爲友兌爲口爲
講兩兌爲習九五初九之君子以朋友講其所知習
其所行相滋相益體麗澤之象

初九和兌吉象曰和兌之吉行未疑也

初九剛而處說无偏係之私能可否相濟者也故曰和兌九四疾惡六三小人然體巽不果不果疑也初九動而上行以濟其決而巽毀九四相易六亦得位而正正則吉故曰和兌吉初九遠於六三无嫌於說小人九四未疑也是以能濟其決否則四疑矣晉嘗祐實直而博范宣子朝夕顧之以問國事不正其身未有能決人之疑者故曰和兌之吉行未疑也

九二孚兌吉悔亡象曰孚兌之吉信志也

六三小人非道來說九二比之以陽說陰宜有悔且

凶九二誠實自信於中動則九五應之信孚于人也
矣雖比於小人和而不同矣何疑於相比哉始雖未
孚終必相說二動而正正則吉而悔亡故曰孚兌之
吉信志也夫石礮石厚父子也叔向叔魚兄弟也子
產伯有同族也雖比也豈能說之易傳曰志存誠信
豈至說小人而自失乎

六三來兌凶象曰來兌之凶位不當也

兌巽之反初二三皆自外來柔不當位而乘剛來說
於二說之不以道者也故曰來兌三高位也柔邪而
說高位凶矣故曰來兌凶楚費无忘漢息夫躬唐任

文乎

九四商兌未寧介疾有喜象曰九四之喜有慶也

離兌爲羸具貨財也四動離爲震噬嗑爲市之象巽變之其於市也爲利三倍商賈之象商賈度利而動故又爲商度之象動承坎坎勞卦勞未寧也商兌未寧者擬議所從度利而未定者乎介者陽剛介于三五之間也從五正也從三不正也陰陽失位爲疾九四陽失位六二陰失位九四以君子疾小人六三以小人疾君子九四宜有憂矣而有喜九五陽得位爲喜四疾六三不與之交動而正上從於五則君臣相

說而有喜矣夫唐虞文武之際得人爲盛而四族三
叔未嘗不疾君子然不害爲治者從君子而不從小
人可不慎其所從乎易傳曰若剛介守正疾遠邪惡
將得君行道福慶及物爲有喜也若四者得失未有
定繫所從耳

九五孚于剝有厲象曰孚于剝位正當也

陰消陽也六三在下進而上則四五消有剝牀之象
故六三謂之剝九五正天位有剛健中正之德當寧
位位與德非不足也然孚于六三之小人則九五危
矣六三取說而已无獻可替否之義小人道長則君

子之道曰消安得不危易傳曰巧言令色孔子舜且畏之其可忽諸

上六引兌象曰上六引兌未光也

上說道之成六正已輔九五剛健中正之君宜有膏澤下於民而未光何也以引六三之小人也三巽爲繩離爲光上六之說三相引之如舉繩然爲山一簣之虧也此所以未光歟六三兌之小人也故初九剛正者不疑於三而行也九二剛中不比於三也而悔士九四以三爲疾九五孚于三而厲上六引三而一未光小人以說進而爲害其可不慮乎

三三坎下巽上渙亨王假有廟利涉大川利貞彖曰渙亨剛
來而不窮柔得位乎外而上同五假有廟王乃在中也
利涉大川乘木有功也

渙否九四之變也險難離散否塞解釋剛柔皆亨故
曰渙亨此以卦變言乎渙也九二之剛自四而來動於
險中二陰不能陷解難散險又處之以中者也險豈
能窮之哉五得中道出乎險外六四之柔自二而往
正位乎外而以巽順上同於五君臣協比能守其中
者也天下之難患處之者不以道及其出險又或不
以道守之則亂者不解解者復亂二五之剛四之柔

易
二十一
處之守之皆不失中故曰剛來而不窮柔得位乎外
而上同此以二四五三又言渙之才所以致亨也天
下離散不安其居者本於人心失中鬼神依人而行
離散則鬼神不饗聖人推原其本將以聚之故建國
設官以爲民極而宗廟爲先宗廟者收其心之渙散
而存之也人孰不有父母知報本則知祭祀出於人
心復其本心則離散者可合而天下無事矣治渙
之道也假至也謂五也上爲宗廟良爲門闕五王位
中者心之位九五有入于門闕至宗廟得心而存
之之象易傳曰卦之才皆主於中王者極渙之道在

得其中而已故曰王假有廟王乃在中也此再以九五而言渙之才也利貞者五也坎爲大川巽爲木爲股據正體巽四二皆爲我用以之濟難而功歸於五言乘木有功則利貞在其中矣合天下之離散非正其可乎故曰利涉大川利貞彖曰乘木有功也此再以九五二四吉渙之才也易言木者三益渙中孚存五行也在卦氣爲六月故太玄準之以文

象曰風行水上渙先王以享于帝立廟

風行水上渙然離散之象離散之時天下之險難方作先王以是享于上帝以一天下之心使知无二主

也立廟以合天下之渙散則人知反本鬼有所歸享于帝立廟離散者一矣帝乾上九也上文爲宗廟巽股爲立坤爲牛坎爲血享于帝也觀此則知魯用郊晉祀夏郊魯有周廟鄭有厲王之廟非先王意也秦位在藩臣臚於郊祀天子不能制反致文武胙卒併天下揚雄曰借莫借於祭祭莫重於地地莫重於天雄其知渙之說矣

初六用拯馬壯吉象曰初六之吉順也

虞翻陸震本作壯吉悔三拯古本作拼音承舉也六四得位近君正而巽可以濟渙然莫或助之初欲拊

四才柔位下而在坎中且四不相應乃捨四用二用
二乃所以拊四也二剛中之才坎爲美脊之馬初二
相易成震震爲作足馬美脊而作足馬之壯健者也
四艮爲手震爲起起手以承六四拊之象易則足以
資六四之剛而載其上矣故曰用拯馬壯吉正則吉
而悔亡初六處不當位本有悔也六坤柔順以陰求
陽始渙而拯之亦順也故曰初六之吉順也五爻皆
言渙初獨不言易傳曰渙離之勢辨之宜早方渙而
拯之不至於渙也

九二渙奔其机悔亡象曰渙奔其机得願也

四巽爲木坎爲揉震爲足艮爲手在上体爲肱揉木
令曲而有足肱據其上机也二四合乃有此象二有
剛中之才處險而不當位宜有悔二能奮身出險
上奔於四四來憑之以安机憑之以安者也是以悔
云震足動奔也故曰奔其机二本否四在二者渙散
之時也二之情不忘乎四猶逃空之人不忘故國奔
則得中心之所欲二中者心之位也故曰得願也
六三渙其躬无悔象曰渙其躬志在外也

所以致渙者險在内也四五濟險之位六三處不當
位近險宜有悔然不與險爭動而之上自脫於險非

拯時之渙以濟人者也其正躬卑巽以遠於悔者乎
坤爲身三上相易折坤成巽離目視下鞠躬之象故
曰渙其躬无悔象曰志在外也之外則无悔三上合
而得正也蘧伯玉聞衛亂而之近關杜洩葬叔孫豹
而行之時乎

六四渙其羣元吉渙有立匪夷所思象曰渙其羣元吉
光大也

坤爲衆渙三陰羣也四巽順而正居近君之位上以
巽乎五下以巽乎二二剛中有濟渙之才而二陰比
之四屈已濟難與衆同患得九二之助陰服矣則散

者合異者同共圖天下之渙是以元吉元吉則濟渙
之志光且大矣坎爲光陽爲大也渙之時用剛則不
足以懷之用柔則不足以制之四二協力剛柔共濟
渙而至於羣天下始可以聚矣五艮爲山半山爲丘
丘聚也六四得九二以合其羣其心思之所存者在
五五得位羣陰之所聚如物之聚於丘五中正善羣
然非四合之亦不得而羣矣四視二陰等夷也四正
初與三不正坤土思也所思匪若二陰之所思不正
故九二爲用二陰服之否則渙散矣其能效美於君
有丘之實乎故曰渙有丘匪夷所思宣王承厲王之

後天下離散召伯之徒佐王建國親諸侯遣使勞來
安集渙其羣也

九五渙汗其大號渙王居无咎象曰王居无咎正位也
有疾者閉塞不通陽降陰升浹於腠理否者身矣否
乾降二坤陰升四降者成坎坎水浹于上下汗出之
象號令如之巽爲號陽爲太九五出號令者也故曰
渙汗其大號五至三體升有風行地上省方設教之
象能發新命以順民上下交通險難解釋渙汗其大
號也渙時民思其主故王居正位乃无咎在他時安
居不能順動則有咎矣故禹別九州而終於冀湯勝

夏而歸于亳武勝商而至于豐王正位則渙散者知
所歸矣乾五爲王艮爲居止也得正則无咎然九五
非六四之賢與上同志安能發大號居其所而治哉
易傳曰再言渙者上爲渙之時下處渙如此爲无咎
上九渙其血去逖出无咎象曰渙其血遠害也

先儒讀渙其血作一句去逖出作一句以象考之當
從先儒九二坎乾爲血血者相傷之象渙五爻不應
上九獨應六三六三近險見傷上九下應之三上相
易上復成坎而傷故曰渙其血言上三俱傷也上九
能去六三遠出乎險之外自處以巽不陷於險則是

去而遠害於義无咎逃遠也故曰渙其血去逖出无咎一本作去惕出巽爲多白眼有惕懼之象然象曰遠害當從逖矣渙時以合渙爲功上九居不用之地故遠害无咎係於六三而不去其傷自取也若施之用事之地則有咎仲由死於衛季羔避禍而去一也

䷧

兌下
坎上

節亨苦節不可貞彖曰節亨剛柔分而剛得

中苦節不可貞其道窮也說以行險當位以節中正以通天地節而四時成節以制度不傷財不害民

節渙之反泰之變也泰分九三之五以節其上之柔分六五之三以節其下之剛剛柔分而有節二五之

剛得中上下節之而不過所謂節者剛柔有節而不
過乎中不過則亨故曰節亨剛柔分而剛得中不曰
柔得中者剛得中則柔不過矣此以卦變二三五爻
言節之所以亨也上六乘剛處險守而不變所以不
可貞者節之道窮也易窮則變變則通通則又守而
不變苦節也凡物過則苦味之過正形之過勞心之
過思皆曰苦苦節則違情性之正物不能堪豈道也哉
申屠狄之潔陳仲子之廉非不正也立節太苦不可
貞也夫節者爲其過於中也故節之使不失其中上
六正而過矣安能節乎故曰道之不行也我知之矣

賢者過之不肖者不及也自不肖觀之過者爲賢自
中言之過不及一也謂之正者貴乎中正也正而失
中不可正也故曰苦節不可貞其道窮也此以上六
无應戒苦節也兌說也坎險也人情易則行險則止
凡止而行皆有險之道節止而不行者也泰之九三
上行自兌成坎以說行險也以說行險雖止不失其
和矣和而不流中立而不倚故曰說以行險此以九
五言節之亨也九五節之位也中正節之道也當位
以中正爲上下之節各適其宜无所不行故曰當位
以節中正以通此以九五言節亨者當有位也九

三一變歸姝震爲春離爲夏節之以春夏也再變節
兌爲秋坎爲冬節之以秋冬也天地有節則陰陽寒
暑不過而萬物成於良故曰天地節而四時成離兌
爲貝貝爲財乾爲金玉坤爲民泰甚則人欲縱人欲
縱則財用匱乏百姓困窮故量財之所入計民之所
用節以制度自下等級而上其費有經其斂有法財
旣不傷民亦不害是以天地不節則四時不成王者
不節則民財不生死非節亨也故曰節以制度不傷
財不害民此又推原卦變玄體以盡節之義也在卦
氣爲七月故太玄準之以度

象曰澤上有水節君子以制數度議德行

澤之容水固有限量虛則納之滿則泄之水以澤為節也君子於民亦然制其多寡制其隆殺制數度也制數度者坎之象也律度量衡皆始於黃鍾冬至之律於辰為子於卦為坎九五以中正為節也乾為德震為行兌口為議議德行者恐其中而未正也易傳曰議謂商度求中節也

初九不出戶庭无咎象曰不出戶庭知通塞也

初九六四正應也往來相易不窮故曰通九二近而不相得窒其所行故曰塞初九兌體剛決動成坎坎

水爲知故知通塞五良爲門闕交兌爲戶四在門闕之中爲庭不出者自守以正而已動有險故不出戶庭乃无咎不出則處也在言語則默亦是也不出而處不語而默雖有止應不說也是之謂節兌爲口舌故繫辭專以慎密不出言之易傳曰通則行塞則止義當出則出矣君子貞而不諒或曰良爲門闕又曰交兌爲戶何也曰兌爲戶震爲門艮土在啓閉之際故爲門闕乾始於子至丑直艮至寅成泰泰者天地交通至卯直震故震交艮爲門震即乾之闕戶也是以雷發聲蟄蟲開戶坤始於午至未直坤至申成否

否者天地閉塞至酉直兌故兌交艮爲戶兌即坤之
闔戶也是以雷收聲蟄蟲坏戶

九二不出門庭凶象曰不出門庭失時極也

極至中也二動歷四應五成震震爲門四在門闕之
中爲庭二以中應五之中極也當其可之謂時故曰
時極時極者時中也九五剛中當位酌民情以爲節
九二有剛中之德動而應以趨節之時則中正之節
達于下矣得時極也若說於三陰與五異趨固而不
知變門庭可出而不出是得時極而自失之也所以
凶者其節不正也故聖人戒之

易六
二十一
六三不節若則嗟若无咎象白不節之嗟又誰咎也

六三柔不當位說而失中不能節之以剛者也有子曰知和而和不以禮節之亦不可行也三不能節則乘剛失位以說從人而已不能堪焉故憂發於口咨嗟而已三變而剛剛不失節而上自應夫何憂哉易傳曰節可以免過而不能自節以致可嗟將誰咎乎此文與離之九三不鼓缶而歌則大耋之嗟凶象異而意同

六四安節亨象曰安節之亨承上道也

節止也凡止物有險之道險非人情之所安上三爻

皆處險六四當位履正安於處險以順承上而止物
焉安於節也六四能安於節者以承上中正之道以
此節下下必應之節道行乎上下而亨亨則通矣非
中正豈能安其節哉易傳曰節以安爲善強守而不
安則不能常豈能亨也

九五甘節吉往有尚象曰甘節之吉居位中也

節者理之不可得而過者也九五居位以中爲制節
之主安行於上而不動甘節也五自泰九三變以說
行險有甘之意先王建國宅中均道里制邦域之時
乎正則吉二說從之往有尚也尚配也往有配乎中

也詩曰商邑翼翼四方之極往有尚也故九二不出
門庭凶彖言當位以節中正以通爻止言居位中何
也彖言九五一爻此言九五九二相易也易傳曰已
則安行天下則說從節之至善者也

上六苦節貞凶悔云象曰苦節貞凶其道窮也

節過乎中居險之極人所不堪下无說而應之者苦
節也不可貞貞則凶其道窮也上九固守乎正不知
俯而就中則悔三五中也悔則窮能悔則云凶矣易
傳曰悔云損過從中之謂也節之悔云與他卦之悔
云辭同而意異

三三

兌下巽上

中孚豚魚吉利涉大川利貞彖曰中孚柔在內而剛得中說而巽孚乃化邦也豚魚吉信及豚魚也利涉大川乘木舟虛也中孚以利貞乃應乎天也

中孚自遯來訟之變也二五不應六三孚于上六四孚于下二爻在中而孚中孚也易傳曰中孚者信之本中實著信之質夫信之未彰无形矣其中已有信也非中虛乎靜而正發而當反諸已而不忤斷然如金石之不可易非中實乎故曰柔在內而剛得中此以三四二五言中孚也上巽施之下說從之巽說相與不期於孚而孚焉猶鳥之孚卵也巽伏於上說從

於下不動而柔者化剛者應拚然而飛矣化邦之道
不幾於是乎坤在上爲邦國外巽內說感之以誠信
久而自化不爲而成也其象巽離化坤巽離者萬物
化成之時故曰說而巽乎乃化邦也此揔六爻而言
中孚也豚魚六四也中孚六四即訟坎之初坎爲豕
其初爲豚三兌爲澤四巽乎澤爲魚六四一爻具豚
魚之象而在中孚之中信及豚魚也先王之交萬物
无非信也取之必有時用之必有節風有騶虞信及
豚也頌有潛信及魚也動物之蕃息著莫如豚魚信
及豚魚上下草木鳥獸无所不及而至誠之道可以

贊天地之化育如是乃吉六四正也正則吉信至於
賞罰而示之者未矣非心服也其終必凶故曰豚魚
吉彖曰信及豚魚也此以六四言中孚也坎爲險難
初越二三涉坎成巽巽爲股涉大川也兌澤而爲大
川決而成川也巽爲木兌金刻其中舟虛也舟虛者
中虛之象九五體巽其中虛不以好惡之私累其心
其下說而不違利以濟難也夫乘木之利乘桴不如
乘舟重載而乘險者不如虛舟之爲安仗誠信而蹈
大難猶乘木而其中枵然豈復有風波之虞哉古之
人虛已遊世五兵兇虎不能害用此道也故曰利涉

大川乘木舟虛也此以四五言中孚之功也天之道不言而善信四時自成萬物自生正而已矣正誠也六四之正乃應乎天者以其心正其心正則其意誠乃應於天之道非人爲也故曰中孚以利貞乃應乎天也此以六四初九相應言中孚也初九本九四乾在上爲天之象在卦氣爲冬至故太玄準之以中

象曰澤上有風中孚君子以議獄緩死

澤上有風澤中應之中孚也中孚信也中孚自訟變坎爲獄九四之初坎成兌兌爲口議獄也議獄者議其獄情之正否也艮六變成中孚艮體盡矣爲游魂

游魂死之象震爲反生緩死也緩死者未必死也君子議獄緩死則好生之德孚于上下矣傳曰冬至四十五日條風至出輕刑解稽留法此象乎

初九虞吉有它不燕象曰初九虞吉志未變也

中孚之初戒在審慎其所信初九六四正應也初宜信四而初四相易以失位爲憂以其有憂也故虞度之虞乃不失其正應故吉虞度而得其所從宜誠一不貳有它則擇利而動心无所主惑矣燕謂三也雷在澤中有燕息之象三非初之正應初與三同體說乎陰而往應之爲有它初之三歸妹象毀而不燕以

其貳也初九所以虞吉者得其所從其志未變於三
變於三矣何燕之有

九二鳴鶴在陰其子和之我有好爵吾與爾靡之象曰
其子和之中心願也

訟離爲飛鳥變震爲鶴說卦震爲鶴鶴古鶴字也穆
天子傳列子皆以鵠爲鶴鶴震聲感兌鳴於正秋九
二之象也九二剛實而中中孚之至者九居二鳴鶴
在陰也坤爲母巽四爲子四與二同體震而九二陽
爲大六四陰爲小故四有子之象二四志同二鳴而
四和二中也四亦中虛心之象其應豈強爲哉出于

中心願而已矣荀子所謂同焉者合類焉者應故曰
其子和之中心願也巽爲命五出命者也陽爲美好
好爵者爵命之美五凶自謂也我四謂五猶曰我君
也爾親乎二也二誠于中四自和之若曰我君有好
爵吾與爾共靡之非二有求於四也四於五其䟽附
之臣乎靡子夏傳陸績作縻巽爲繩縻繫之象當作
縻孟子曰我善養吾浩然之氣莊子曰吾无食我无
糧古人文章相錯而成此爻所謂我吾亦然易傳曰
至誠无遠近幽深之間唯知道者識之

六三得敵或鼓或罷或泣或歌象曰或鼓或罷位不當

也

敵者勢均而不相下也艮之彖曰上下敵應不相與也言六爻勢均當應而否故子夏傳曰三與四為敵蓋三四同躰而異意近而不相得六三不正小人也六四正君子也三小人不見信於君子而志在得四四終不可得震為鼓三動鼓而進將以張之也而四不應既罷而退將以誘之也而四不來三動離為目兌澤流目或泣以感之而四不憂巽為長震為聲兌口為言長聲以永其言或歌以樂之而四不悅或鼓或罷或泣或歌小人之情狀盡矣四守正終莫得之

處位不當无以取信於君子也豈能強得之哉

六四月幾望馬匹亡无咎象曰馬匹亡絕類上也

四處當位近君其道上行成孚者也訟離爲日坎爲

月坎變震月在東也離變兌日在西也月東日西望

也五在中四爲幾望陰道之盛盛則敵君禍敗必至

不可不戒古者駕車四馬兩服爲匹兩驂爲匹不能

四馬則駕兩馬曰駢駢亦匹也四震爲作足馬四應

初成坎坎爲美脊之馬兩馬匹也震坎陽卦類也四

之上絕其類而不應則馬匹亡矣孚道在一四上從

五亡其匹則絕係應之私无敵君之禍易傳曰係初

則不進其能成孚乎

九五有孚攣如无咎象曰有孚攣如位正當也

九五在上六四在下君臣之位正也九五剛健中正
六四柔巽正而順君臣之德當乎位也五四君臣相
孚上下固結如攣然相易以致用故无咎攣拘攣也
五四相易有巽股良手離目相就拘攣之象夫忠為
令德苟非其人不可君臣之際非位正德當其孚如
是豈能无咎乎

上九翰音登于天貞凶象曰翰音登于天何可長也

巽為雞剛其翰也柔其毛也翰羽翮也震為聲上動

反三成兌雞振其羽翮而後聲出于口翰音也乾五
爲天六三往上陰爲虛翰音登于天也鳥之類聲聞
于天者鶴也雞无是實虛聲聞于上雖登于天湏臾
則反其可長乎巽爲長三之上巽毀何可長也不信
之極正乎其凶故曰貞凶張載曰信之无實窮上必

凶



艮下
震上

小過亨利貞可小事不可大事飛鳥遺之音

不宜上宜下大吉彖曰小過小者過而亨也過以利貞
與時行也柔得中是以小事吉也剛失位而不中是以
不可大事也有飛鳥之象焉飛鳥遺之音不宜上宜

下大吉上逆而下順也

小過與中孚相易其卦四陰二陽陽爲大陰爲小小者過也六五過四而亨於外六二過三而亨於內蓋事有失之於偏矯其失必待小有所過然後偏者反於中謂之過者比之常理則過也過反於中則其用不窮而亨矣故曰小過亨彖曰小者過而亨也此以四陰之中舉六二六五言小過也小過自臨來明夷變也臨九二之三六三之二成明夷二過乎三也明夷初九之四成小過五過乎四也二過乎三正也五過乎四不正也不正者矯其失而過正也正者時所

當過過所以就正也所謂時者臨之兌秋也震春也
明夷之離夏也坎冬也小過之艮終始也過與時行
而六二之正不動於六二不動乃能小過而亨利貞
也君子制事以天下之正理所以小過者時而已譬
之寒或過於陰暑或過於陽冬裘夏葛无非正也
故曰過以利貞與時行也此以六二言小過也二五
之柔皆得中也五得中得尊位過而在上者也二得
中得正過而在下者也巽爲事正則吉小過之道不
以位之上下於小事有過而不失其正則吉柔得中
也九四剛失位九三剛而不中震爲作陽爲大作大

事非剛得位得中不能濟失位則无所用其剛不中則才過乎剛是以小過之時不可以作大事故曰小事吉不可作大事此以二三四五言小過也明夷離爲鳥初往之四自下而升有飛鳥之象四易坤成坤震震爲聲聲往於上而止於下飛鳥遺音之象巽爲風飛鳥遺之音逆而上則難順而下則易上逆也故不宜上下順也故宜下小過之時事有時而當過所以從宜不可過越已甚然亦豈能過哉聲言如飛鳥泝風決起而上騰其音安能遠過俄頃而止矣大者如是則吉不然必凶時不可犯也故曰有飛鳥之象焉

飛鳥遺之音不宜上宜下大吉此復以初九之四言
小過也中孚肖乾小過肖坤故二卦爲下篇之正鄭
康成曰中孚爲陽貞於十月子小過爲陰貞於六
月未法於乾坤以卦氣言之爲立春故太玄準之以
差

象曰山上有雷小過君子以行過乎恭喪過乎哀用過
乎儉

雷出地上其壯乘乾山上有雷小有所過也君子有
時而小有所過者三巽乎上下而過行過乎恭也震
巽爲號咷而上六過之喪過乎哀也巽爲高坤爲吝

畜處高而吝畜逼下已甚矣初六過之用過乎儉也
時當小過君子不得小有所過以矯正一時之過
考父之過恭高柴之過哀晏平仲之過儉非過於理
也小過乃所以爲時中也

初六飛鳥以凶象曰飛鳥以凶不可如何也

明夷離爲鳥初之四飛鳥也以如師能左右之曰以
四動體而躁初艮體不正柔而止不當過也有應在
四爲四所以不當過而過其過至甚如飛鳥迅疾雖
欲救止不可如何其凶必矣坎爲可四以之坎毀不
可也兌口如何也與鼎信如何也同象是謂惡成而

不及改者易傳曰小人躁易而上應助過速且遠不容救止也

六二過其祖遇其妣不及其君遇其臣无咎象曰不及其君臣不可過也

三乾在上爲父四爲祖五坤陰居尊位配乎祖妣也曰祖曰妣旣過之稱六二中正祖尊也妣亦尊也祖不中正於義當過妣中而過之義不可也過則失中矣故遇之遇不期而會五不應二以中相會故遇之言過而適與中相當也五君之位坤居之坤臣也過而適及於臣之分則可過而及於君過臣之分也於

義爲有咎故不可不戒易傳曰遇當也過臣之分其
咎可知

九三弗過防之從或戕之凶象曰從或戕之凶如何也

九三剛正而應上六應則過五五中也中不可過三
戒在小不忍用剛以過中故弗過宜正己自守防小
人則吉兌澤坤土止之防也三不防乃捨所守從之
剛過乎中上或戕害之矣離爲戈兵已動失正戕之
也戕者外傷之如何兌口也與初六如何同象不能
守正見戕於外其凶果如何也晉陽處父易狐射姑
之班伯宗言於朝而諸大夫莫若皆過之而弗防改

及於難

九四无咎弗過遇之往厲必戒勿用永貞象曰弗過遇之位不當也往厲必戒終不可長也

四不當位以剛履柔為得宜矣故无咎四下應初則過二二中也弗可過也知二不可過乃與五遇五亦中也弗過二則與中適當遇得其道矣若去柔用剛進而之五往則危厲故必以用剛為戒往之五成離戈兵之象不動兌為口戒也小人過君子之時不戒而用剛鮮不為禍故丁寧之既曰必戒又曰勿用永貞當隨時處順不可固守其正是以終无咎也然

易六
盛衰相循无小人常過君子之理巽爲長陸震曰小
者之過終不可長也戒而慎之以俟其復

六五密雲不雨自我西郊公弋取彼在穴象曰密雲不
雨已上也

兌澤之氣上而爲雲兌盛陰也故爲密雲澤降爲雨
小過自明夷變初九往四成兌澤氣已上而未降雲
雖密而無雨故曰密雲不雨已上也言陰過陽君子
之澤未能下也四在內外之交而見天際郊之象四
兌西也五震東也巽風揚之雲自西往東由陰而升
陰唱則陽不和不雨之象故曰自我西郊三公位明

夷三坎爲弓離爲矢初之四成巽巽離爲絲以絲繫
矢弋也弋取之器也坎兌爲穴坎幽隱也艮爲手取
也彼謂二六二在穴中有中正之德處於幽隱九三
君子俯而取之往助於五然六二六五同爲陰類三
雖取之豈能濟大事乎小過之時柔得尊位二陽在
下爲陰所過不能成功三下取二用力多矣亦豈能
濟哉謂四陽爲我二陰爲彼以陽爲主也若中孚陽
謂陽則謂五曰我自謂曰吾謂二曰爾尊卑之義小
畜象曰密雲不雨尚往也自我西郊施未行也其辭
與小過六五同蓋小畜所畜者小小過則所過者小

皆不可以作大事過之則畜之矣一卦雖殊而大者
爲小者所畜而不得施則一也故關子明曰小畜一
卦之體當小過一爻之義然則畜之一也小大之時
異焉

上六弗遇過之飛鳥離之凶是謂災眚象曰弗遇過之
已亢也

上六不與五相當失中也又動而過之則甚矣而况
處小過之極於時爲已亢乎故曰弗遇過之上動成
離離爲飛鳥爲目巽爲繩以繩爲目罔罟之象其違
理過常猶鳥飛過其自離于罔罟故曰飛鳥離之凶

動則不正故凶離有伏坎災也弗遇過之災乃自取
非天也人也而曰災者過之極窮之災也於時已
亢也人事過越如此使知時而守正未必能免已亢
故也



離下坎上

既濟亨小利貞初吉終亂象曰既濟亨小者

亨也利貞剛柔正而位當也初吉柔得中也終止則亂
其道窮也

既濟自泰來豐九四變也泰來兌為澤九二之四成豐
四已濟險而小者未盡亨九四之五則小者亨矣於
濟為既其卦三陰得位三陽下之大者既濟小者亦

亨亨貞傳曰陽已下陰萬物既成不曰小亨而曰亨
小者大者之濟爲亨小者而濟非爲已也禹思天下
之溺猶已溺之稷思天下之飢猶已飢之亨至於小
則小大畢亨故曰既濟亨小彖曰既濟亨小者亨也
彖文當曰既濟亨小者亨也脫一字此以三陽下
三陰而言既濟也以陽下陰非正也亨之也剛君子
也柔小人也剛柔不失其正君子小人各當其位无
犯分躐等之非守既濟之道也故曰利貞剛柔正而
位當也此以六爻當位而言既濟也自泰至賁二復
三變始於二之四成豐次四之五成既濟其終五之

上而成賁濟天下之難莫若剛過剛亦不可以濟失
人心也方濟之初以柔濟剛則其柔得中剛者爲用
天下之難有不濟乎此既濟之初所以吉正則吉也
既濟矣上六變艮成賁艮止也止而不進不復有爲
文飾而已濟終則極衰亂復起終以亂也蓋其道已
窮故曰初吉終亂彖曰初吉柔得中也終止則亂其
道窮也終始時也治亂者道之窮通也晉隋有天下
不旋踵而亂不知終止則亂之戒也易傳曰唯聖人
爲能通其變於未窮不使至於極也堯舜是也故有
終而无亂此推原卦變以九五一文言既濟之終始

也在卦氣爲十月故太玄準之以成

象曰水在火上既濟君子以思患而豫防之

水火相逮而後濟天地之道以坎離相濟以日言之
日降則月升以月言之日交則月合以歲言之寒來
則暑往皆既濟也坎上離下既濟矣然既濟之極水
火將反其初故既濟之象未濟藏焉君子不可不思
慮以豫防其患坤土爲思坎爲險難患也土防水防
也在既濟之時而防險難豫也思患而豫防之則難
伏而不作或曰五動坤變坎成震體豫而未濟之象
毀矣

初九曳其輪濡其尾无咎象曰曳其輪義无咎也

三坎爲輪初卦後爲尾初九剛而離體炎上有應進於上其志必銳時旣濟矣動而進不已必至於咎故戒之初動之四成艮艮爲手曳也坎輪在水火爻中火欲上水欲下亦曳也曳其輪不輕進尾濡坎水不速濟止之於初持重緩進以全其剛而不至於極則於旣濟之義爲得矣故曰義无咎也

六二婦喪其茀勿逐七日得象曰七日得以中道也

二坤爲輿三坎爲輪二之五離變震坤離爲文震爲竹竹有文蔽車之前者茀也離爲婦婦人乘車不露

見有第乃可以行五於既濟之時安其位无動而有
爲之意二雖有文明中正之德不得遂其行婦喪其
第也五坎爲美脊之馬二五相易震爲作足之馬逐
也五不下二二當以中道自守故戒以勿逐逐則失
其素守而不正七日得自二數之至上爲五復自初
數之至二凡七日以中道也中道者天地之所不能
違故坤極生乾七日必復而況人乎易傳曰自古既
濟用人蓋鮮矣以唐太宗之用言猶忌於其終況其
下者乎雖不爲上所用而中正之道无終廢之理不
得行於今必行於異時

九三高宗伐鬼方三年克之小人勿用象曰三年克之
憊也

坤爲鬼爲方五坎爲險帝繫有鬼方氏鬼方蓋國名
小國於旣濟之時恃險不來九五離體有戈兵用九
三往伐之坤爲年自四數之歷三爻三之上成巽巽
爲入入其險也上之三成坤順也旣入其險鬼方來
順三年克之也克難辭也九三剛正君子也上六之
三柔而不正小人也高宗中興之賢君伐鬼方氏之
小國歷時之久至於三年而後克之其方亦憊矣況
用小人乎坎爲勞重坎憊也小人非貪慾不爲其禍

至於殘民肆慾遂喪其邦故戒以小人勿用爻言勿
用小人象曰憊者聖人慮後世勤兵於遠託高宗以
伐以濟其欲勞民動衆三年克之雖高宗行之亦憊
也

六四禱有衣袽終日戒象曰終日戒有所疑也

四坎水也初之四成巽巽木在水上舟之象四未交
初巽毀坎見舟漏也四坤爲裳禱裳也初乾爲衣良
爲手袽塞也離日在下終日也允爲口戒也巽爲不
果疑也六四近君而正明於防患資初九之賢彌縫
九五之闕終日相戒如奉漏舟不唯自竭而初九助

之如有裳及衣衾塞其漏苟可以豫防者无不爲斯能濟乎重險矣制治保邦之道患至而後慮之无及已心有所疑知禍亂之源必先事而塞之乃保既濟之道故曰終日戒有所疑也易傳曰不言吉者方免於患也既濟之時免患足矣无復有加矣

九五東鄰殺牛不如西鄰之禴祭實受其福象曰東鄰殺牛不如西鄰之時也實受其福吉大來也

泰震爲東兌爲西三四鄰也兌爲刑殺坤爲牛坎爲血離爲夏震爲聲上爲宗廟九二之五有長子奉祀東鄰殺牛西鄰禴祭之象殺牛成祭也禴尚聲薄祭

也盛不如薄者時也二五均有中正之德然二未濟有進也九自五來二以虛受故曰實受其福正吉陽爲大吉大來也五既濟无所進也盈則當虛故曰不如西鄰之禴祭也理无極而不反者既濟極矣時已往矣五以中正守之能未至於反而已易傳曰至於極則雖善處无如之何矣

上六濡其首厲象曰濡其首厲何可久也

上既濟之極以剛處之猶恐其反六安其位而不變必有顛隕陷溺之患上反三乾爲首濡於坎水之中濟而至於水濡其首危極矣濟之窮也其可長乎巽

爲長易曰既濟之終小人處之其敗可立而須也

三二

坎下離上

未濟亨小狐汔濟濡其尾无攸利彖曰未濟

亨柔得中也小狐汔濟未出中也濡其尾无攸利不續終也雖不當位剛柔應也

未濟自否來既濟之反也否塞之時六二之柔得中而上行天地相交否者亨矣柔而不中則介於二剛其能亨乎故曰未濟亨柔得中也此以二五言未濟也艮坎爲狐小狐初爻也艮之初爻爲小狐猶中孚之豚亦初爻也爾雅曰譏汔也詩曰汔可小康鄭康成曰汔幾也四爲坎險五爲中出險也初往之四幾

濟而未及於五未出中也狐首輕尾重老狐聽水負尾而濟其剛不息是以終濟卦以成卦言之上爲首爲前初爲尾爲後以畫卦言之初爲始爲平上爲終爲末上九剛也初六柔也小狐不度而進未能審慎其前則剛其後乃柔凶坎濡其尾往无攸利以其剛不足不續終也然則濟險者其在於審慎始終如一剛健不息者乎孟喜曰小狐濟水未濟一步下其尾故曰小狐汔濟未出中也濡其尾无攸利不續終也此以初六九四相易言初六之柔不足以濟險難也未濟六爻雖不當位而剛柔相應苟量其度時慮善

而動上下內外相與未有不濟者也故曰雖不當位
剛柔應也此以六爻申未濟有可濟之理也在卦氣
爲十一月故太玄準之以將

象白火在水上未濟君子以慎辨物居方

未濟自否變否艮止也慎之象離爲明辨也火陰物
也居南水陽物也居北二物有相濟之理火上水下
各居其所未濟也君子觀此慎辨萬物使各居其所
有辨然後有交辨之以正其體交之以致其用不辨
則不交有未濟乃有既濟而未濟會既濟之象

初六濡其尾吝象曰濡其尾亦不知極也

卦後爲尾坎水濡之濡其尾也初處險下而上有應其志欲動在未濟之時剛動則出險於濟爲得其分量矣極分量之極也初柔九二又以剛在前阨之雖有應可動而柔不能動吝也於是而欲濟是亦不知極也猶獸欲濟而力柔水濡其尾則不能舉終亦不出乎險矣坎水爲知

九二曳其輪貞吉象曰九二貞吉中以行正也

坎爲輪二往五應艮爲手曳其輪也坎輪在水火爻之中水欲下火欲上亦曳也二中也九二之五中以行正也未濟時六五柔處尊位五所賴者九二剛中

也剛非臣德之正也剛或好犯恭順之道或有不足
故戒以曳其輪則緩進以盡恭順於臣爲中於道爲
上行中以行正者正未必中中以行正則盡矣易傳
曰唐郭子儀李晟嘗艱難未濟之時能保其終吉者
用此道也

六三未濟征凶利涉大川象白未濟征凶位不當也

三處險中唯至剛乃可以出險六柔不當位未濟也
以柔而行外接上九則乾首沒於坎中淪胥以溺之
象雖正亦凶實武何進是也故曰征凶三四非應當
未濟之時三資其助四近而協力巽股出險利涉大

川矣

九四貞吉悔亡震用伐鬼方三年有賞于大國象曰貞吉悔亡志行也

九居四有悔動而正正則吉而悔亡四動體震震爲威怒坤爲鬼方坎爲險四近君剛而明有濟之道初恃險未順四用其威怒以入其阻伐鬼方也自三至初歷三爻坤爲年三年而後順克之也克難辭艮山坎川坤土田賞之象坤四爲國陽爲大有賞于大國非貞吉悔亡其志於上下乎二卦言伐鬼方者借此以明必濟之義天下之弊固有盤結而難去者四凶

頑民歷世既久乃能去之故曰貞吉悔亡易傳曰古
之人用力之甚者伐鬼方也故以義動而遠伐至於
三年然後成功而行大國之賞必如是乃能濟四居
柔故戒以此

六五貞吉无悔君子之光有孚吉象曰君子之光其暉
吉也

六五文明之主柔居尊位悔也虛中而下九二二往
五正以剛濟柔故貞吉无悔坎爲光君子之光謂九
二也五離爲明二與五應光明相燭有孚也暉者光
之散管輅曰日中爲光朝日爲輝朝日初出其光輝

散也言二五未交其德暉之所及已孚于上下則吉
濟險難者君必剛正臣必有不言之信然後委任篤
下无間言功濟天下而无後患不然凶必至矣

上九有孚于飲酒无咎濡其首有孚失是象白飲酒濡
首亦不知節也

上孚于三三震坎爲酒上反三成兌坎流于兌口有
孚于酒也三之上得正无咎也未濟之極无極而自
濟之理非剛健之才得時得位上下孚應終不濟也
上九君子有才而不當位與六三相應而无可濟之
資以其有孚矣相與飲酒樂天順命以俟可濟之時

則於義无咎上反三乾首濡于酒中則從樂耽肆亦
不知節矣坎允節之象也有孚若然失是義矣晉魏
之交士多逃于麴蘖无濟時之志以故世復大亂聖
人之戒不其深乎易傳曰人之處患知其无可柰何
而故意不反者豈安於義命者哉

周易下經豐傳第六

履之不躓也

而然意不反皆宜安矣然意不反皆宜安矣
人之好不其利乎息野之好不其利乎息野宗何
之安士矣非于險難天交士矣非于險難天
不吐噴矣夫余噴之象吐噴矣夫余噴之象
順於義也